

EWE KOKKOTUN MANAU ESE MUCH



MET EWE KOKKOTUN MANAU ESE MUCH?

Ewe **Kokkotun manau ese much** * ina an Kot we kokkoten pwapwa fan iten Noun kewe semirit. Mi anongonong won ewe **Achasefanin** Jises Kraist. Ika kopwe tapweno mwirin an Jises Kraist kewe afanafan, kopwe kuna kinamwe non ei manau me pwapwa fochofoch mwirin mano.

Nupwen ka kaeo usun ewe kokkotun manau ese much, kopwe kuna pwonuen ekkei kapas eis: “Ia ua feito me ia?” “Met ai popun non manau?” “Ia upwe feino ia mwirin ei manau?”

IA UA FEITO ME IA?

Manauom ese poputa nupwen ka uputiw, me esap mucheno ren mano. Ka for seni eu **ngun** (fan ekkoch a iteni ngunun non) me eu inis. Semach won Nang a fori ngunum, me ka manau ren I

pwe emon ngun me mwen ka uputiw won fonufan. Ka sinei me tongei I, me A sinei en me a tongek. Ei fansoun a iteni **manau me mwen ei fonufan**.

Me non manauom me mwen ei fonufan, ka kaeo ekkewe nongonong me annuk minne repwe emwen ngeni pwapwa. Om mirit a wattenno me ka kaeo ne tongei ewe ennet. Ka kaeo usun ewe kokkotun manau ese much.

Me non ewe manau me mwen ei fonufan, Jises Kraist a kefinita pwe epwe ewe Chon Amanau; ka kaeo pwe seni I kopwe tongeni pworacho ngeni niwinin om kewe foffor mi mwan.

Eu kinikinin an Kot we kokkot mi auchea ina pwe kopwe feito ngeni fonufan me angei eu inis me kopwe kaeo ne finata met mi pung. Kosap chechemeni fansoun ka nonnom fan mesen Semach won Nang, nge I epwe ngonuk ewe tufich ne sinei met mi pung me met mi mwan. Kopwe tongeni esinna An tong me ennet. Seni om kewe foffor me weires, kopwe kaeo ne fini mi

Ewe kokkotun [manau ese much] . . . mi ammonata seni nepoputan ewe fonufan, me ren Kraist, fan iten meinisin ekkewe ir repwe nuku won itan.

Alma 22:13

*Wewen ekkewe kapas mi parapar mi fatetiw won peich 18 me 19.

Ewe famini mi nom nukunapan an Semach won Nang we kokkot.





pung. Ren aninis seni Jises Kraist, kopwe tongeni niwinsefanita ne nonnom ren Semach won Nang nupwen manauom won ei fonufan a much.

Non manauom me mwen ei fonufan, ka kaeo pwe seni chok om finata ne tapweno mwirin an Kot we kokkot ka tongeni angei kinamwe me pwapwa non ei manau me ren fansoun ese much. Pokiten A tongek, Semach won Nang a ngonuk **pungun finata**, are ewe manamanen pwisin finata och mettoch. I a mut ngonuk om kopwe fini ika kopwe tapweno mwirin An we kokkot me ewe Samon Jises Kraist.

Setan, emon noun Kot kewe non pekin ngun, a u ngeni Semach won Nang me ese etiwa An we kokkot. A mochen echimwa kich meinisin ne fori netipan. Sonapan pwe, chommong noun Semach won Nang kewe semirit ra fini ne tapweno mwirin Setan. Kot a tinano Setan me noun kewe chon tapweno seni fan mesen me ese mut ngenir ar repwe uputiw me won fonufan. Ra sopweno ne nonnom non pekin ngun. Ra riaffou, me ra mochen pwe kopwe riaffou. Ra sotunuk me pwan meinisin noun Kot kewe semirit ne fori ekkewe mettoch ra efisata netipengaw me mettoch rese apwapwaiti Kot.

Non manauom me mwen ei fonufan, ka finata ne nuku non Jises Kraist me tapweno mwirin an Kot we kokkot. Pokiten ekkewe mettoch ka finata, ka uputiw won fonufan. Seni chok om finata ekkei mettoch ka tongeni weri kinamwe non ei manau me kopwe tongeni niwinsefan ne nonnom ren Semach won Nang mwirin ei manau a much.

*Ina mo kese tongeni chechemeni,
me mwen ka feito ngeni ei
fonufan ka nonnom fan mesen
Kot, Semom we Ese Much, me
Noun we At, Jises Kraist. Ka
pupuchor fan iten om pwapwa
nupwen ka angei ewe tufichin
feito ngeni ei fonufan ne angei eu
inis me tapweno mwirin an Kot
we kokkot fan iten om pwapwa.*

Wewen ekkewe kapas mi parapar mi fatetiw won peich 18 me 19.

Mi wor chommong mettoch sipwe kaeo me kuna non ei manau.

MET AI POPUN NON EI MANAU?

Ewe Forata me ewe Turutiw

Ewe fonufan a for pwe eu neni faniten noun Semach won Nang kewe semirit ne nonnom me angei tipachem. Atam me If ir akkaewin noun Kot kewe semirit ne feito ngeni fonufan. Ra nonnom non eu neni a iteni ewe Ataken Iten, ikkewe ia ra chuen nom fan mesen Kot ia.

Semach won Nang a ngeni Atam me If ar pungun finata, are tufichin finata. A annuku ngenir pwe resap ochei ekkewe foun ira seni ewe iran sinei minne mi och o mi ngaw. Ar anneaso-chisi ei annuk a wewen pwe ra tongeni nonnom non ewe atake, nge rese tongeni sopweno ne kaeo seni ar kewe foffor me osukosuk. Setan a sotuni Atam me If ne ochei ewe foun ira mi annuk pwe resap ochoch, iwe ra finata ne ochei. Iei eu kinikinin an Kot we kokkot. Pokiten met ra finata, ra aimufesen seni fan mesen Kot non pekin inis me non pekin ngun. Ra winiti chon fonufan, wewen, pwe ra riaffouni niwinin tipis me mano. Rese tongeni niwinsefan ngeni I ika esep punun An aninis. Ar aimufesen seni Kot non pekin ngun me non pekin inis a iteni **ewe Turutiw.**

Semach won Nang a tinato chon nang me ewe Ngun mi Fel ne aiti Atam me If usun ewe kokkotun manau ese much. Ei kokkot mi anongonong won ewe Achasefanin Jises Kraist, minne a atufichi noun Kot kewe semirit ne pworacho ngeni niwinin ewe Turutiw me angei pwapwa non ei manau me non fansoun ese much.

“**A**re pwe Atam esap fori ewe tipis,
iwe, esap fakkun turutiw, iwe, i epwe chok
nonnom non ewe manaman Iten. . . .

“Iwe [Atam me If] resap tongeni wor nour
semit; iei minne ir repwe nom non ewe
tetenin fakkun nimenimoch, ese wor ar
pwapwa, pokiten resap miriti met netipechou;
are fofor ingaw, pokiten rese miriti met tipis.

“Nge nengeni, mettoch meinisin a pwak seni
tipacheman ewe a sinenapei mettoch meinisin.

“An Atam a turutiw pwe aramas repwe;
are ra fen, pwe repwe mefi pwapwa.”



Manauom won Fonufan

Pokiten ewe Turutiw, ka aimufesen seni Kot non pekin ngun me non pekin inis. Ei aimufesen mi eu kinikinin an Kot we kokkot fan iten Noun kewe semirit. Popun om feino seni fan mesan ne feito fonufan a masou ngeni om angei eu inis, kaeo seni forfor, me kaeo ne fori met mi pung.

Chommong kinikinin manau a efisata pwapwa, me ekkoch ra efisata netipechou. Ekkei mettoch ra anisuk ne kaeo pwe kopwe sinei nefinen mi och me mi ngaw me ifa usun ne fini met mi pung. Kot a pesei ngonuk pwe kopwe forforoch me tapweno mwirin I, nge Setan a sotunuk ne nikitano Kot me fori tipis. (Tipis a wewen om finata ne fori met mi mwan are pwe kosap fori met mi pung.) Nupwen ka finata ne tapweno mwirin Kot me anneasochisi An kewe annuk, ka mamarita non mirit me pochokunen manau. Ka tongeni weri pwapwa non fansoun weires, me ka tongeni sapengeni osukosuken manau ren eu ngunun kinamwe.

Ka fen finata chommong mettoch mi och me non manauom, nge ka pwan finata ekkoch mettoch mi ngaw. Nupwen ka finata och mettoch mi ngaw me ka tipis, ka pwisin aimufesenuk seni Kot. Ekkewe pukfel ra kokkori ei aimufesen **mano non pekin ngun**. Fiti om aimufesen seni Kot, tipis a pwan efisata mengiringir me saw. Kese tongeni pwisin pworacho ngeni niwini tipis.

*“Ngang Emon Noun Kot,
A tinieito ikkei,
A ngeniei eu imwei
Ren semei me inei.
Emweni ei, awena ei,
o fiti ei
Anisiei kuna ewe an.
Aiti ei met upwe fori
Ne nonnom ren i eu ran.”*

Konfel, nampa 57

Ewe Achasefanin Jises Kraist

Pokiten Semach won Nang a tongek, A tinano Noun we At, Jises Kraist, ne moni tipisum kewe. Monatiwen mi eu kinikinin ewe Achasefanin Jises Kraist. Jises Kraist a pwisin riaffou fan

“Pun Kot a fakkun tongei chon fonufan, ina minne a fangeno Noun we anamon, pun iteitan aramas mi nuku i resap mano nge repwe kuna manau ese much.”

John 3:16

iten tipisum kewe, metek, samau, me netipechou. Seni An **chen** me umoumoch, A tongeni anisuk non om kewe weires me a tongeni anisuk pwe kopwe ngaseno seni ewe mengiringir me saw minne a fis seni tipisum kewe.

Non an monatiw tipisum kewe, Jises ese angei senuk om tufichin finata are pwisin wisom — Esap animenimochukeno ika kese mochen. Ne angei An

aninis me pochokun, mi namwot pwe kopwe anganga om nuku non I, aier, me paptais, angei ewe Ngun mi Fel, me finata ne tapweno mwirin An kewe afanafan ren unusen manauom. Nupwen ka anongonong won ewe Achasefan, kopwe mefi ewe tongen Kot, me Epwe anisuk ne nikitu tori nesoponon om kewe weires. Kopwe weri pwapwa, kinamwe, me pochokun. Mettoch meinisin mi nikinikinin pwe ese och non manau mi tongeni ochuno seni ewe Achasefanin Jises Kraist me ewe chen me tongen Semach won Nang. Ewe Achasefan a nom nukunapan ewe kokkoten manau ese much.

IA UPWE FEINO IA MWIRIN EI MANAU?

Seni wewen non pekin fonufan, **mano non pekin inis** a nikinikinin nesoponon, nge ennet mi eu nepoputan, eu ipweip ngeni an Semach won Nang we kokkot. Non mano, ngunum epwe feino seni inisum me epwe feino ngeni ewe **nenien ngun**, minne a eu nenien kaeo me ammonata. Non ewe nenien ngun, kopwe chuen chechemeni ei manau.

Wewen ekkewe kapas mi parapar mi fatetiw won peich 18 me 19.

Ewe Chon Amanau a riaffou fan iten tipisich kewe me non ewe Ataken Gethsemane.



Nupwen ka mano
ngunum a tou seni
inisum me a feino ngeni
ewe nenien ngun, eu
nenien ammonata, kaeo,
me asoso seni pekusun
tumunuoch me weires.

Mano esap siwini fetanin manauom are om mochen met mi och are mi ngaw. Ika ka finata ne tapweno mwirin Kraist non manauom won fonufan, kopwe kinamwe non ewe nenien ngun me kowpe asoso. Ekkewe ir ra finata pwe resap tapweno mwirin Jises Kraist me rese aier resap pwapwa.

Semach won Nang a sinei pwe chom-mong Noun kewe semirit resap angei tufichin kaeo usun Jises Kraist non manauer me ekkoch repwe finata pwe resap tapweno mwirin I. Pokiten A tongei Noun kewe semirit, Kot a awora eu an fan iten ekkewe ir mi nom non ewe nenien ngun ne kaeo usun An we kokkot, nuku non Jises Kraist, me aier. Ekkewe ir ra etiwa me tapweno mwirin Jises Kraist repwe weri kinamwe me asoso.

Manausefanita me Kopung

Eu nein ekkewe niffangen Kot mi napanap ngeni meinisin ekkewe ir ra feito ngeni fonufan mi ewe **manausefan**, minne mi tufich seni ewe Achasefanin Jises Kraist. Nupwen Jises a mano won ewe irapenges, Ngunun we a feino ngeni ewe nenien ngun. Unungat ran mwirin, Ngunun we a chufengen sefan ren inisin mi ningoch, me unusochuno minne ese chuen tongeni mano. Ei ochufengenin inis me ngun a iteni *manausefanita*. Aramas meinisin ra uputiw won fonufan repwe manausefanita.

Mwirin ka manausefanita, kopwe feino mwen Kot pwe kopwe kopung anongonong won om kewe foffor me won mochenin netipom.

Wewen ekkewe kapas mi parapar mi fatetiw won peich 18 me 19.

Ewe Chon Amanau mi manausefanita a pwa ngeni Mary.



Ekkewe Kinikinin Ning

Mwirin ka angei kopung, kopwe manau non kinikinin ning. Pokiten forofun me netipen aramas ra sokkono, mi wor sokkopaten muu, are kinikinin ning.

Mun Selestial. Semach won Nang me Jises Kraist ra nonnom non ewe mun selestial. Ika ka manaueni ekkewe nongonongen ewe kapas allimen Jises Kraist me ka nimenimoch seni tipis me ren ewe Achaesfan, kopwe angei eu neni non ei, ewe muu mi napanap. Kopwe nonnom fan mesen Kot me kopwe sinei ennetin pwapwa.

Mun Terrestrial. Aramas rese mochen etiwa ewe kapas allimen Jises Kraist nge ra manauoch repwe angei eu neni non ewe mun terrestrial.

Mun Telestial. Ekkewe ir ra sopweno non ar tipis me rese aier repwe angei eu neni non ewe mun telestial.

Ewe Achasefanin Jises Kraist a atufichi manau ese much.

Manau me Mwen ei Fonufan

Forata me
Turutiw

Manau won Fonufan

Nuku non Jises Kraist
Aier
Paptais
Ewe Nifangen ewe
Ngun mi Fel
Nikitu tori Nesoponon

Mano non
Pekin Inis

MET EWE KOKKOT A WEWEN FAN ITEI?

Nupwen ka weweiti pwe Kot I Semom we, me A tongek, me A atufichi ngonuk pwe kopwe weri manau me mirit ikkei me winiti usun chok I mwirin ei manau, ka sinei auchean met ka fini non manauom. Ka weweiti pwe mi namwot kopwe tapweno mwirin Jises Kraist ne angei unusen ekkewe efeiochun an Semach won Nang we kokkot.

Nenien Ngun

Manaesefanita
me Kopung

Mun Selestial

Mun Terrestrial

Mun Telestial

IFA USUN UA TONGENI SINEI?

Eu miritin ewe kokkoten manau ese much mi wattenno a feito ngenikich punun ewe Aniwinsfaniton ewe kapas allimen Jises Kraist me ren ewe Soufos Joseph Smith.

Ka tongeni pwisin sinei pwe ekkei mettoch mi ennet me ren om tingor ngeni Semach won Nang non iotek. Epwe pwonueni me ren ewe Ngun mi Fel. Ewe Ngun mi Fel mi pwan iteni ewe

Ngunun Kot, me eu nein wisan kewe ina pwe epwe pwarata usun ewe ennet. Ewe Ngun mi Fel a pwarata me apungano ennet me ren memmef me ekiek. Ekkewe memef ra feito seni ewe Ngun mi Fel mi manaman, nge ra pwan pwetete me mosonoson. Usun mi afanafan me non ewe Paipen, “Nge iei ekkewe uwan Ngunupin: tong, pwapwa, kinamwe, engino, umoumoch, manauoch, nikiitu, tipetekison me nemeni mochenin netipach” (Galatia 5:22–23). Ekkei memef ra eu sokkun apungano me ren ewe Ngun mni Fel pwe ei poraus mi ennet.

Mwirin mi namwot pwe kopwe finata

ika kopwe manaueni manauom pwe epwe wewfengen ren ekkewe afanafanen Jises Kraist usun mi niwinsefanito me ren Joseph Smith.

Ifa Usun Upwe Iotek?

- *Kokori iten Semom won Nang.*
- *Pwarata ekkewe mefien netipom (kinisou, kapas eis, tingor ne apungano ennetin ewe Puken Mormon me met ekkewe misineri mi afanafan).*
- *Osopwano (“Fan iten Jises Kraist, amen”).*



TETTENIN KAPAS

Achasefan Ewe mettoch a fis minne a atufichi ngenikich pwe sipwe chasefan ngeni Kot. Achasefani a wewen riaffouni niwinin tipis, iwe epwe uweino niwinin tipis seni chon tipis mi aier. Jises Kraist I chok ewe emon mi tongeni fori eu Achasefan mi unu-soch faniten aramas meinisin. An asoren Achasefan a masoueni An riaffou faniten tipisich, surutiwen Chaan, me An mano me Manausefan. Pokiten ewe Achasefan, chon fonufan meinisin repwe manausefan. Ewe Achasefan a pwan awora ngeni kich eu anen ach sipwe museno seni tipisich me sipwe manau fengen ren Kot feinfeino chok.

Chen Aninis me pochokun seni nang mi kawor me ren ewe umoumoch me tongen Jises Kraist. Seni An chen, minne a tufich me ren An we Achasefan, aramas meinisin repwe manausefanita. Me ren An chen, ekkewe ir mi sopweno ne aier me manaueni An we kapas allim repwe mefi pwe ra arap ngeni Semach won Nang me non ei manau me repwe nonnom fan mesan mwirin ei manau.

Efeioch Eu forfor mi pin a fis ren mwumwutan ewe pristut. A wewen usun chok paptais, angei ewe Ngun mi Fel, me ewe sakramen. Efeioch mi eu napanapen tonong non pwon ren Kot.

Ewe Turutiw Ewe mettoch a efisi pwe aramas repwe mano. A efisata eu aimufesen seni Kot non pekin inis me non pekin ngun. Pokiten Atam me If, ekkewe aramas akkomw, ra anneasonap an Kot kewe annuk, ra aimufesen seni fan mesan (ei aimufesen a pwan iteni mano non pekin ngun) me ra tongeni mano (tufichin mano non pekin inis.) Pokiten kich mwirimwirin Atam me If, sia pwan aimufesen seni Kot me sia tongeni mano. Ewe Achasefanin Jises Kraist a pworacho ngeni mano non pekin inis me non pekin ngun.

Kokkotun manau ese much An Semach won Nang we kokkot ne awora ngenikich ewe tufich pwe sipwe winiti usun chok I me angei unusen pwapwa. Ei kokkot a anongonong won ewe Achasefanin Jises Kraist me a masou ngeni meinisin ekkewe annuk, efeioch, me afanafanen ewe kapas allim.

Manau ese much Ngaseno seni tipis me mano. Manau ese much a tufich me ren ewe Achasefanin Jises Kraist. Me ren ewe Achasefanin Jises Kraist, aramas meinisin repwe pworacho ngeni ekkewe niwinin mano. Sia pwan tongeni manau seni ekkewe niwinin tipis me ren nuku non Jises Kraist. Ei nuku mi pwar non eu manauen aier me anneasochis ngeni ekkewe annuk me efeiochun ewe kapas allim me angang ngeni Kraist.

Manau me mwen ei fonufan Manauach me mwen sia uputiw me won ei fonufan. Non ach manau me mwen ei fonufan, sia nonnom fan mesen Semach won Nang pwe Noun kewe non pekin ngun. Ese wor inisich.

Manausefan Mwirin mano non pekin inis, ewe chufengenin ewe ngun ren ewe inis mi unusochuno ren futuk me chuu. Jises Kraist a akkomw ne manausefanita. Mwirin ewe manausefanita, ewe ngun me inis rete aimuno sefan, me ewe emon a manau tori feinfeino chok. Aramas meinisin ra manau repwe pwan manausefan pokiten ewe Achasefan.

Mano non pekin inis Ewe aimufesenin ewe ngun seni ewe inis. Nupwen ewe inis a mano, ewe ngun a sopweno ne manau non ewe nenien ngun. Sia pworacho ngeni manon inis me ren manausefanita, minne a tufich me ren ewe Achasefanin Jises Kraist.

Mano non pekin ngun Aimufesen seni Kot pwe niwinin anneasonap ngeni An kewe annuk. Sia manau seni mano non pekin ngun me ren ewe Achasefanin Jises Kraist nupwen sia aier me anneasochisi An kewe annuk.

Nenien ngun Ewe neni ngunuch kewe ra feino ia nefinen mano me manausefan. Fan iten ekkewe ir ra wenechar me non manauer, ewe nenien ngun epwe eu nenien pwapwa me kinamwe.

Ngun Ewe kinikinin emon aramas mi nonnom ren Semach won Nang me mwen uputiwan. Non manau won fonufan, ewe ngun mi chufengen ren eu inis. Ewe ngun a sopweno ne manau mwirin mano.

Pungen Finata Ewe niffang seni Kot ne finata nefinen mi och me mi ngaw, nefinen met mi pung me met mi mwan.

PWAN OCH NE KAEO NGENI

Ekkei kapas eis me wokisin repwe anisuk ne kaeo pwan och usun ekkewe nongonong non ei puk me ekipwichir. Ei tettenin kapas eis me wokisin rese unus; ekkewe minen esinisin non ekkewe pukfel repwe emwenuk ngeni pwan ekkoch wokisin me minen aninis.

A ifa usun om chiechi ren Kot me mwen ka uputiw?

Jeremiah 1:5 (Paipen, Testamen Nom)

Hebrew 12:9 (Paipen, Testamen Sofo)

Met ewe Turutiw? Pwata mi namwot?

2 Nifai 2:14–26 (Puken Mormon, peich 39–40)

Alma 42:2–9 (Puken Mormon, peich 124–25)

Met ewe popun manauom ikkei? Ifa usun ei mirit a tongeni ekkesiwini met ka finata iteitan ran?

2 Nifai 2:25–27 (Puken Mormon, peich 40)

Alma 34:32 (Puken Mormon, peich 115)

Met ewe Achasefan? Ifa usun a tongeni anisuk non manauom iteitan ran?

John 3:16–17 (Paipen, Testamen Sofo)

Rome 3:23–25 (Paipen, Testamen Sofo)

2 Nifai 2:6–8 (Puken Mormon, peich 37–38)

Alma 7:11–12 (Book of Mormon, page 225)

Alma 42:22–23 (Puken Mormon, peich 126)

Met ewe nenien ngun? Met a fis ikkewe?

1 Peter 4:6 (Paipen, Testamen Sofo)

Alma 40:11–14 (Puken Mormon, peich 119–120)

Met wewen manausefanita? Ion epwe manausefanita?

Pwata manausefanita mi auchea?

2 Nifai 9:13–15 (Puken Mormon, peich 51–52)

Alma 11:42–45 (Puken Mormon, peich 100–01)

Met wewen nang? Pwata mi wor fitu kinikinin ning?

1 Korinth 15:40–43 (Paipen, Testamen Sofo)

FITEKEM NON AM FEN NGENI KOT

KENE FEITO O NENGENI IFA USUN ANIWINSEFANITON
EWE KAPAS ALLIM A TONGENI EFEIOCHU MANAUOM



Mwichen sakrament ena ewe mwichen fen mi napanap. Ururun epwe ukukkun eu awa me epwe masoueni ekkei mettoch mi nom fan:

Ekkewe Kon: Chon ewe mwich ra kon fengen (Aupwe awora ekkewe puken kon.)

Ekkewe Iotek: Chon Mwichefen repwe wisen iotek.

Ewe sakrament: Chon pristut repwe efeiochu me ineti pinewa me konik ngeni chon ewe mwich non achechemenien ewe Achasefanin Jises Kraist.

Chon Afanafan: Ururun emon are ruemon chon mwichefen ir mi fen kefin me mwan repwe afanafan ngeni chon ewe mwich usun itenapen kapas allim.

Ufouf: Ururun mwan me at repwe ufouf non sut are rausas mi kat ren echo soch me nektai. Fefin me nengin repwe ufouf non skaato mi kat.

Nifangenon moni ese namwot non mwichen fen.

Aua pwan etiwok om kopwe fiti pwan ekkoch mwich, anongonong won met ka sani me ierum. Tettenin me fisin ekkei mwich mi sokopat.

Sukunen Raninfel: Klasin kaeo ekkewe pukfel me nongonongen ewe kapas allim.

Mwichen pristut: Klas faniten mwan me anuon a 12 ierir are watte seni.

Fin Anisi: Klas fan iten fefin a 18 ierir are watte seni.

Ekkewe Fopun: Klas fan iten nengin a 12 ngeni 18 ierir.


Kinter: Mwokutokutun mwich me klas faniten semerit a 3 ngeni 11 ierir. Fan ekkoch epwe wor eu mwich faniten ekkewe semerit a 18 maramer ngeni 3 ierir.



Kunoken mwichen sakrament: _____

Iten nenien Imwenfan: _____

Met Upwe Fori?



- Anneani ewe Puken Mormon.

Mi och kopwe anneani: _____

- Kene iotek om kopwe sinei pwe met ekkewe misineri ra aituk mi ennet.
- Fiti fan.
- Ammonata ne paptais won _____
- Nengeni www.mormon.org ne kaeo pwan och usun ewe kapas allimen Jises Kraist mi niwinsefanito.
- Kopwe soþweino ne chufengen ren ekkewe misineri ne kaeo pwan och usun ekkewe ennet Kot a aniwinato me ren ekkewe soufos non fansoun soþonon.

Ranin ach chusefan: _____

Iten ekkewe misineri me namþan nour we fon:

EWE MWICHEFENIN
JISES KRAIST
REN ARAMAS MI PIN NON
FANSOUN SOPONON

www.mormon.org

Esinnan Chon Fori Sasing

Apponun me mwan: Chunganin A Manausefanita, seni Del Parson. © Del Parson. Kosap kapini

Peich 11: Chunganin Kraist non Gethsemano, seni Harry Anderson

Peich 13: A Manausefanita, seni Greg Olsen. © Greg Olsen. Kosap kapini

Peich 3: seni Yung-Lung Chou

Peich 17: seni Shih-Yee Huang

© 2012 seni Intellectual Reserve, Inc. Meininis pung mi kawor. Mi for non Merika.
Kapungunon non fosun Merika: 11/05. Kapunguno chiakun: 11/05. Chiakun *The Plan of Salvation*.
Chuukese. 01141 901

CHUUKESE



4 02011 41901 5

01141 901